



**Komunikadu Imprensa**  
**Munisípiu Covalima**  
**12 Fevereiru 2024**

**JSMP liuhosi semináriu rejionál apresenta rezultadu survei  
“Persepsaun no Satisfasaun Utilizadór no Fornesidór Serbisu iha  
Sistema Justisa Formál iha Kazu VBJ”**

Iha 08 Fevereiru 2024, JSMP realiza semináriu rejionál hodi apresenta rezultadu survei kona-ba Persepsaun no Satisfasaun Utilizadór no Fornesidór Serbisu iha Sistema Justisa Formál iha Kazu Violénsia Bazeia ba Jéneru (VBJ) ba parte sira mak hanesan autoridade lokál, polísia, estudante, parseiru no comunidade sira balun iha Munisípiu Covalima.

“objetivu hosi semináriu ne’e, atu introdús ka apresenta filafali rezultadu survei ne’ebé JSMP ho KOICA halo ona iha fulan Marsu to’o Juñu 2023 no lansa iha 23 Novembru 2023. Survei ne’e halo hodi hatene klean kona-ba atendimentu sira iha sistema justisa formál ba kazu VBJ no saida mak sai dezafiu hodi hadi’ak iha futuru. Nune’e survei ne’e, inklui mós rekomendasaun lubuk ida ba institusaun relevante sira atu bele hadi’ak serbisu sira hodi garante sistema justisa ida ne’ebé bele responde efetivamente ba kazu sira VBJ”, dehan Sra. Ana Paula Marçal, Diretora Ezekutiva JSMP.

Iha abertura Dignísimu Prokuradór, Dr. Pascasio de Rosa Alves, nu’udar Kordenadór Prokuradoria Repúblika Primeira Instánsia Covalima, agradese ba JSMP tanba bele realiza semináriu rejionál ne’e, no agradese tanba JSMP kontinua tau-matan ba serbisu tribunál nian no serbisu profisionál sira, liuliu autoridade judisiáriu sira iha sira nia atividade.

Dignísimu Prokuradór ne’e hatutan liután katak justisa formál bele alkansa ho efektivu no efikasias bainhira iha sistema kontrolu ne’ebé forte no di’ak hanesan daudauk JSMP halo. Ida ne’e bele ajuda tribunál sira atu hadi’ak kualidade serbisu. Kordenadór Prokuradór ne’e hatutan katak dalaruma tenke fó koresaun no krítika tanba nu’udar prokuradór rekoñese katak dalaruma iha aplikasaun pena ba kazu VBJ, JSMP no comunidade sira dala barak dehan pena ne’ebé aplika ba kazu VBJ favorese liu ba arguidu/kondenadu no la fó satisfasaun ba vítima maibé juis sira aplika pena la ses hosi lei, aplikasaun pena tenke haree kastigu ne’e adekuaudu ka lae, proporsionál ka lae no suficiente ka lae. Prinsípiu ida ne’e mak tenke konsidera iha aplikasaun pena. Mezmu nune’e, prokuradór ne’e sujere katak tenke fó krítika no rekomendasaun ba iha lakuna sira atu nune’e bele hadi’ak liután iha futuru.

Hafoin apresentasaun rezultadu survei ne’e hosi Sr. Casimiro dos Santos, nu’udar jestór Programa JSMP, partisipante sira hato’o sira nia apresiasaun ba survei ne’e no hato’o katak loos duni comunidade sira ninia kazu ne’ebé

tama iha sistema justisa formál han tempu kleur no laiha informasaun ba comunidade nune'e comunidade la hatene andamentu hodi sira nia kazu. Ho nune'e, partisipante sira husu ba JSMP atu nafatin serbisu ho comunidade, akompaña comunidade nia kazu iha tribunál no ajuda informa andamentu kazu sira ba comunidade.

Iha parte seluk partisipante sira mós kestiona kona-ba kazu inestu ne'ebé nia prosesu iha tribunál kleur no seidauk iha desizaun. Alende ne'e, kestiona mós kona-ba krime kontrabandu.

Enkuantu observaun Dr. Pascasio de Rosa Alves ba iha rezultadu peskiza ne'e, rekoñese problema sira iha setór justisa ka fornecedor sira maibé tenke rekomenda ba instituisaun relevante sira hotu kria kondisaun tanba realidade tribunál menus rekursu umanu no facilidade no kestaun kona-ba adiamentu kazu sira, alende tribunál menus rekursu umanu, adimentu sira dalabalun kontribui mós hosi parte sira ne'ebé buka justisa ka utilizador justisa sira ne'ebé la kolabora di'ak ho tribunál ka la marka prezensa iha loraon julgamentu.

Partisipante sira ne'ebé partisipa iha semináriu ne'e hamutuk ema na'in 33 (feto 13 no mane 20) mak hanesan prokurador no ekipa, representante Juis Tribunál Judisiál Primeira Instáncia Suai, VPU Distritál Suai, Xefe suku sira hosi Suku Matai, Suku Camnasa, Oques, Debus no Maudemo, representante KOICA, Fokupers, PRADET, Uma-Mahon Salele, ALFeLa, Estudante sira UNPAZ Paralelu Suai no Mídia sira.

Semináriu Rejionál ne'e realiza ho apoia orsamentu hosi KOICA liuhosi UNDP ba Programa "Hamutuk ba Igualdade".

**Atu hetan informasaun kompleitu, favór kontaktu:**

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>  
[info@jsmp.tl](mailto:info@jsmp.tl)